



19. april 2017

Inatsisartut Suleriaasianni § 37 naapertorlugu Naalakkersuisunut apeqqutit imaattut matumuuna saqqummiuppakka:

**Naalakkersuisunut apeqqutit ilinniarfinnik nussuinissaq pillugu:**

- 1. Naalakkersuisut aalajangivissimanerlugu inunnik isumaginninnermut siunnersortinngorniat ilinniarfiat Ilulissanut nuunneqassasoq, Eqqumiitsuliornermut ilinniarfik Aasiannut, KTI Sisimiunut kiisalu Niuernermut Ilinniarfik NI Qaqortumut?**
- 2. Nussuinissap aalangiiffigineqarsimanera pillugu Naalakkersuisut Siulittaasuata kiisalu Inunnik Isumaginninnermut, Ilaqutariinnut, Naligiisitaanermut Inatsisinillu atuutsitsinnermut Naalakkersuisup assortuunnerannut suna pissutaava?**
- 3. Naalakkersuisut ilinniarfinni sisamaasuni pineqartuni ilinniarfittisut ilinniarfittullu aperisimanerlugit nussuinissamut pilersaarutit qanoq isumaqarfigineraat?**
- 4. Ilinniarfiit sisamaasut nussornissaat qanormita akeqassava? Tassungu ilanngullugu Naalakkersuisut peqquneqarput nussuinerup kingunissai isummerfigeqqullugit eqqarsaatigalugit kollegiat aamma ilinniarnermut atatillugu suliffiit sungiusarfissat naatsorsuutigineqartariaqarmat, ilinniarnermut atatillugu suliffiit sungiusarfissat amerlanerpaartaat Nuummiinnassasut?**
- 5. Ilinniarfiit nussornerisa aallartinnissaat qaqugu pissasutut Naalakkersuisut eqqarsaatigaat?**
- 6. Ilinniarfiit sisamat taakkorpiaat Nuummiit nussornissaannut suliatigut suut tunngavilersuutaappat? Imaluunniit ilumoortoq unaaginnanngila, politikikkikut kissaatit taamaallaat nussuinnermut tunngaviusut.**  
(Inatsisartunut ilaasortaq Randi Vestergaard Evaldsen, Demokraatit)

#### **Tunngavilersuut**

Inunnik isumaginninnermut siunnersortinngorniat ilinniarfiat Ilulissanut nuunneqarniarpoq, Eqqumiitsuliornermut ilinniarfik Aasiannut, KTI Sisimiunut kiisalu Niuernermut Ilinniarfik NI Qaqortumut.

Tamanna Naalakkersuisunit nalunaarutigineqarpoq. Imaluunniit taamaappa? Naalakkersuisut Siulittaasuut isumaqarpoq, aalangiisooqareersoq, illuatungaanili Inunnik Isumaginninnermut,



Ilaqtariinnut, Naligiisitaanermut Inatsisinillu atuutsitsinermut Naalakkersuisoq paarlattuanik isumaqarpoq.

Tukalluinnarpoq taamannalu ilinniartitsisut, ilinniartut imaluunniit innuttaasut sinneri taamatut pineqartariaqanngikkaluarpot.

Demokraatini isumaqarpugut, nussuinissamut eqqarsarnej kukkunerusoq. Ilinniarfinnik nussuinerup kinguneranik ilinniartut akornanni taamaattinnartoqassaaq aamma ilinniartitsisut akornanni soraarniuteqartoqassaaq. Tamatumunnga pissutaavoq inuit taakku ilaqutaallu aalajangernikummata ulluinnarni Nuummi inuuneqarusullutik. Inuit inuunerat toqqissisimanerallu taamatut aserorruusaannarneqarsinnaanngilaq. Demokraatini isumaqarpugut, kusanarnerungaassasoq sulliviit nutaat allallu pisortat suliffiutaat nutaat takkukkumaartussat sinerissamut nuunneqartuuppata pioreersut nussoqinagit.

KANUKOKA-p nuunneqarneranut atatillugu aqqusaakkateqqarsartitsisariaqaraluarpot. KANUKOKA Nuummiit Maniitsumut nuunneqarmat sulisut arlaannaataluunniit nooqataanissani kissaatigisimanngilaa aamma KANUKOKA-p atorfinnik sulii inuttalerneqanngitsunik inuttaliinissani sulii ilungersuutiguarpa.

Apeqqutit akeqquneqarput ullut suliffiit naliginnaasut qulit iluanni.